

«Mias spetgas èn sa cumprovadas»

Flavio Bundi, bainprest in onn schefredactur, davart sias experientschas al timun publicistic dad RTR

CUN FLAVIO BUNDI
HA DISCURRÌ ANDREAS CADONAU / ANR

■ Sia elecziun è stada in pau ina surprisa, bier temp da discutir la rolla da Flavio Bundi al timun publicistic dad RTR nun è stà a disposiziun. Il servetsch public da las medias svizras è stà en il focus politic paucas emnas suenter ch'il nov schefredactur ha surpiglià sia incarica. Ord vista persunala è quella situaziun na stada in dischavantatg, sco che Flavio Bundi ha tradi. Ses emprims tschient dis en uffizi èn dadi passads, l'emprim onn al timun dad RTR anc betg cuntanschi. Nagin motiv da desister dad in pèr dumondas a Bundi davart sias experientschas ed intenziuns.

Vus avais strusch cumenzà cun vossa incumbensa sco schefredactur tar RTR e gia stads confruntads cun la dumonda existenziala da l'interpresa en connex cun la votaziun No-Billag. Ina situaziun in pau speziala?

Flavio Bundi: Jau n'hai betg gi bier temp da ponderar quel fatg. Ord mia optica persunala n'è la situaziun betg stada uschè mala. Jau hai pudì cumenzar a lavurar directamain vi da cas e temas concrets. Quai apprezzesch jau fitg. Gist en uschia ina fasa plain tensiun èsi impurtant da pudair discurre davart noss product, nossa puschida e nossa incumbensa. Tras la discussiun da No-Billag ha RTR, ma era la SRG SSR gi la pussaivladad da manar blers e constructiv discurs davart sias incumbensas e la legitimaziun.

Impurtant da discurre

Ed uss, suenter in pèr mais schefredactur RTR, co sa preschenta la situaziun?

Jau hai spetgà ina lavur fitg interessanta e la realitad dat cumplainamain raschun a mia spetga. Jau hai spetgà da pudair lavurar cun persunas cun blera experientscha e cun persunas pli giuvnas che vullessan forsa midar inqual chaussa. Da quella cumbinaziun pon ins profiter viceversa. Mias spetgas nun èn sa differenziadas fitg da la realitad. Bleras chaussas pertutgant far televisium u radio èn stadas novas per mai. Jau hai dentant bier gust dad emprender. En quel grà in sigl en l'aua fraida, l'ambient dad RTR ha dentant lubi da s'acclimatisar fitg svelto.

Bleras chaussas novas

En mintga interpresa existan ierarchias. N'è il nov e giuven schefredactur betg fruntà sin opposiziun?

Jau crai che gist la perspectiva dad ordvart haja fatg bain a la chasa RTR. E per l'auter sun jau in tip che vulless esser datiers da las persunas che lavuran en chasa e profiter da la savida existentia. Jau na sun betg entrà en uffizi cun l'idea da far tut nov. Quai che funcziuna ston ins mantegnair. Natiralmain vi jau purtar mia vista en il manaschi. Impurtant èsi dad integrar la gliעד sin la via a las conclusiuns e decisiuns, alur è la prontadad per midadas spert avant maun. Jau na sun betg in tip che decida insanua persul. La via communabla è impurtanta, uschi giuven na funcziuna la chaussa betg. Cler, inqual giadas ston ins decider chaussas che n'èn betg fitg emper-



Tschertgar soluziuns communablas e magari mussar in chau in zichel pli dir, Flavio Bundi, bainprest in on al timun publicistic dad RTR.

MAD

naivlas, per tuts betg, quai appartegn dentant a la missiun dal schefredactur. En talas situaziuns dovri in zichel in chau dir.

È Vossa incarica plitost tgira d'equipa u tschentar il binari publicistic?

Cleramain ina maschaida, i dovra omadus. Dad ina vart la lavur da timunar e decider davart il persunal, definir la strategia ed avisar la direenziun futura. Da l'autra vart hai jau la responsabladad publicistica. Vul dir metter ils gronds accents ed uschia era tschentar il binari publicistic dad RTR.

Sigl en l'aua fraida

Accents publicistics, pertutgan quels era la fatschenta da mintgadi?

Gea, nus discutain mintga di tge istorgia vegn emessa sur tge chanal ed en tge furma. Sche jau hai il sentiment ch'i fess necessari da sefatschentar cun ina tematica, forsa betg exnum nà da l'actualitad, era tematicas pli vastas, sche dun jau era qua mes input.

Enconuschentamain sa chatta il public da las medias etablidas en ina vegliadetgna pli avanzada. È Vossa incarica atgnamain dad avischar RTR ad in public pli giuven?

Bun, en quel connex ston ins remartgar ch'il public pli vegl è in public fitg fidai-vel ch'ins sto tgirar. Quai è ina premissa ch'ins na dastga betg emblidar. Nus stuain ir cun noss cuntegn là nua che la gliעד sa chatta. Per social media avain nus creà ina pitschna redacziun che sa drizza en emprima lingia ad in publicum en la vegliadetgna da 20 e 30 onns. La furma da raquintar nossa istorgia sa differenziescha da la furma da raquintar visavi als mediums classics. L'istorgia sezza resta dentant la medema. Via livestream u forsa era via radio pon ins cuntanscher la gliעד a moda differenta. La gronda sfida tar nus è da mantegnair ina vasta puschida nà dal servetsch public. Per exempel cun differents stils da musica en noss program da radio. Da jazz, pop, rock enfin musica classica e da plazzar quella musica gist dal temp ch'ils auditurs plectentads taidlan radio.

Betg decider persul

Tschertgar soluziuns futuras. Voss antecessur en il post dal schefredactur sa fatschenta entaifer RTR cun il svilup da l'interpresa, el tschertga medemamain soluziuns futuras?

Il contact tranter la partiziun da svilup e program sto e duai esser fitg stretg. Gist nus sco pintga part da l'interpresa SRG SSR stuain esser preparads sin tuttas novaziuns. La collavuraziun tranter program e la partiziun che sa fatschenta cun il svilup da l'interpresa funcziuna fitg bain.

È la rolla dad RTR entaifer SRG SSR, simplamain la pitschna part insanua dapersai?

Na, RTR ha bleras giadas la rolla da pionier. Ina giada per mais s'inscuntran ils schefredactors da las differentas partiziuns dad SRG SSR e nus discutain per exempel co tractar elecziuns naziunales u co collavurar tranter las singulas regiuns linguistics. L'avantatg dad RTR è da pudair realisar singulas novas mesiras bier pli svelto. Mes collegas èn alur in pau surstads sche jau confess che RTR haja gia instradà ina u tschella chaussa ch'ils auters èn anc londervi da lantschar. Per exempel in redactur che fa sper ina contribuziun da radio anc in video. En quel senn è la grondezza da la partiziun rumantscha da la SRG SSR in avantatg. Nossas vias da comunicaziun èn bier pli pitschnas. E nus na sa chatta in betg tant en il focus public sco las autras parts da l'interpresa. Uschia essan nus magari ils emprims ch'emprovan insatge nov e ch'evalueschan alura ils resultats.

Gust dad emprender

RTR è sco las autras partiziuns fitg preschenta sin ils divers chanals da las medias online sco twitter, facebook ed auter. Simplamain ina moda u porta quella preschientscha effectiv insatge?

I porta extrem bier, cunzunt en il contact cun il public. Sper ils gieus u las gratulaziuns entaifer il program da radio pussibiliteschan quels chanals da communicar direct cun il public. Saja quai via commentaris u messadis, l'interpresa retschaiva uschia ina fatscha, daventa persunala. Betg sulet ils giuven èn activs sin quels chanals, sco ins po far stim per exempel sin facebook. Nus avain augmentà nossa preschientscha via instagram e facebook e las cifras creschan.

Dovra in zichel in chau dir

L'incumbensa publica e schurnalistica dad RTR resta tuttina la medema independentamain dal cbanal?

L'incumbensa resta la medema e quai vulain nus er. Nossa obligaziun nà dal servetsch public è definida e la finamira da porscher ina qualitat schurnalistica sco criteri il pli impurtant resta.

Sa preparar sin novaziuns

Ed ussa pudessa lantschar ina lunga discussiun davart la dumonda tge è qualitat schurnalistica. Insatge auter: I croda en egl che RTR rinforza actualmain il sport regiunal. Ina part da la nova strategia?

Las regiuns èn per mai e per la chasa fitg impurtantas. Politica naziunala ed internaziunala è ozendi omnipreschenta en las medias. Quai che marscha local, en las regiuns, è main preschent e tar las regiuns appartegn er il sport regiunal. Uschia sa porscha la pussaivladad dad era qua esser datiers al public. Per nus è per exempel la quarta e tschintgavla liga da ballape bier pli impurtanta che la Champions League. In motiv per RTR da tematisar il sport regiunal.

Ina chaussa vulless jau anc savair. Dapi intgin temp indichescha il redactur al radio mintgmai il lieu da la redacziun responsabla per la contribuziun. Ina mesira instradada dal nov schefredactur e per tge motiv?

En connex cun la midada dal format da novitads è l'annunzia da la redacziun responsabla vegnida introducida. Ina decisiun crudada avant mes temp tar RTR. Era per mussar nossa preschientscha or en las regiuns.

La musica vi jau mantegnair

Sper tant schurnalissem, ha Flavio Bundi anc peda per la musica?

Jau hai gist cumenzà cun in project cun kontra-cant. L'october cumenzan las provas cun il Chor maschadà Suraua. La musica resta impurtanta per mai sper l'incumbensa professionala. Malgrà ina incumbensa che pretenda blera atenziun vers quai che chapita en il mintgadi e da recepir quai che curra e passa ston ins magari far in stop. Ed alura è la musica impurtanta, insatge che jau vi mantegnair.

Dun jau in input